

**Տ. ԱՐՇԱԿ ԵՊԻՍԿՈՊՈՍ ԽԱՉԱՏՐՅԱՆԻ ՔԱՐՈԶԸ՝
ԽՈՍՎԱԾ Ս. ԷԶՄԻԱԾՆԻ ՄԱՅՐ ՏԱՃԱՐՈՒՄ
ՄԱՏՈՒՑՎԱԾ Ս. ՊԱՏԱՐԱԳԻՆ**
(12 հոկտեմբերի 2008 թ.)

«Յանուն Հօր եւ Որդւոյ եւ Հոգոյն Սրբոյ. Ամէն»

*«Աղաչեմք զքեզ՝ մա՛րդասէր Տէր, առաքեալ
զՀոգիդ Սուրբ, ի ջուրս յայս. և օրհնեա՛ և
սրբեա՛ զսա, և տո՛ւր ամա զշնորհն Յորդանա-
նու. և արա՛ զսա օրհնութեան աղբիւր, անա-
պականութեան պարզև, մեղաց լուծումն, հի-
ւանդաց բժշկութիւն, դիւաց ահագին խորտա-
կումն, ախտաժետաց առողջութիւն...»*

*«Աղաչում ենք Քեզ, ով մարդասեր Տէր, ա-
ռաքիր Քո Սուրբ Հոգին այս ջրերի վրա, օրհնիր
և սրբիր այն, տո՛ւր Նրան շնորհներ, ինչպես
Հորդանան գետին, և այն դարձրու օրհնությա՛ն
աղբյուր, կյանքի՛ աղբյուր, անապականության
պարզև, մեղքերի լուծում, հիվանդների համար
բժշկություն և դևերի համար խորտակում, ախ-
տերով տառապողներին որպես առողջութ-
յուն»:*

(Ճաշոց)

Միբելի՛ քույրեր և եղբայրներ,

Շուրջ տաս օրեր առաջ Վեհափառ Հայրապետի ձեռամբ, մեր բարձրաստիճան ե-
կեղեցականների անմիջական մասնակցությամբ, բազմահազար ուխտավորների ա-
ղոթական զորակցությամբ, Մայր Աթոռ Ս. Էջմիածնում կատարվեց վերջին շրջանի
կարևորագույն հոգևոր իրադարձություններից մեկը. օրհնվեց Սրբալույս Մյուռոնը:
Արարողություն, որը ազգային եկեղեցական մեր կյանքում մեծ խանդավառություն,
ոգևորություն և հուզում առաջ բերեց, ինչպես այսօր բազմաթիվ հավատացյալներ,
ուխտավորներ ժամանել են Մայր Աթոռ Ս. Էջմիածին՝ իրենց աղոթքներով մասնա-
կից լինելու Սրբալույս Մյուռոնի օրհնության արարողությանը, ստանալու Մյուռոնի
օրհնությունը: Եվ ահա տաս օրեր հետո Նորին Սրբության մասնահատուկ տնօրի-
նությամբ այս օրը, այս կիրակի կատարվելու է Ջրօրհնյաց արարողություն, որի ըն-
թացքում Սրբալույս նորաեփ Մյուռոնը հեղվելու է այս կաթսաների մեջ լցված ջրի
մեջ՝ այն սրբելով, մաքրելով չարի բոլոր տեսակի ազդեցություններից և ներգործու-
թյուններից, այն դարձնելու համար բուժարար, հոգու նորոգության համար անհրա-

ժեշտ հոգևոր մի նյութ: Եվ քիչ հետո այդ արարողության ընթացքում է, որ պիտի ահա ընթերցվի, վերստին աղոթք վերառաքվի Տիրոջը՝ ասելու. «Ո՛վ Տեր Աստված, առաքի՛ր Քո Սուրբ Հոգին այս ջրերի վրա, դարձրո՛ւ այն այնպիսին, ինչպիսին Հորդանան գետն էր, որը շնորհն ունեցավ իր մեջ կրելու Տիրոջը, այն դարձրո՛ւ մեղքերի լուծում, հիվանդներին բժշկություն, ախտերով տառապողների համար՝ առողջություն»:

Իրապես նախախնամական էր, որ այսօր սուրբգրային ընթերցվածքի մեջ ևս մի ստվար հատված նվիրված էր ջրին: Ջուրը, ինչպես որ աղոթքն է ասում, կյանքի և օրհնության աղբյուր է: Եվ ահա Եսայի մարգարեն, որ հայտնի էր իր հուզական բնավորությամբ, իր մտրակող խոսքով, մեղքի նկատմամբ անհանդուրժողությամբ, երբ որ խոսում է եգիպտացիների մասին՝ կանխատեսելով նրանց վրա հասնող պատուհասները, քանի որ եգիպտացիներն իրենք հալածել էին Իսրայելի ժողովրդին՝ Աստծո ժողովրդին, նրանց կանխատեսում է խիստ մոայլ ապագա և հետևյալն է ասում. «Եգիպտացիները ծովափնյա ջրակույտերից են խմելու, որովհետև գետը նվազելու է և ցամաքելու է: Գետերն ու գետերի ջրադարձները քաշվելու են, հավաքված բոլոր ջրերը ցամաքելու են, և բոլոր մարգագետինները, եղեգի բոլոր խիտ թավուտներն ու լորամարգերը ցամաքելու են, գետի եզերքներին եղած ողջ կանաչը, բոլոր հերկերը, որոնք գետի ջրով են մշակվում, խորշակահար չորանալու են: Ձկնորսները տրտմելու են, գետի մեջ բոլոր կարթ գցողները հոգոց են հանելու, ցանց և ուռկան գցողները սուգ են անելու, ամաչելու են նաև բարակ կտավ մանող կտավագործները և նրանք, որ բեհեզ են գործում, բոլոր արհեստավորները տրտմությամբ են համակվելու, բոլոր տարագագործները տխրելու են»:

Ջուրը կյանքի աղբյուր է: Եգիպտացիներին պատժելու համար, այն մարդկանց, այն ազգերին պատժելու համար, ովքեր որ ընդդիմացել են Տիրոջ կամքին, ովքեր որ խոտոր ճանապարհներով են ընթացել, նրանք պարզապես զրկվում են կյանքի այդ աղբյուրից: Երբ որ երկիրը ցամաքում է, ջրից զրկվում են մարդիկ, իսկապես օրհնությունն է, որ վերցվում է այդ ժողովրդի, այդ երկրի վրայից: Ջուրը նաև հիվանդության դեմ առողջարար մեծ բուժամիջոց է: Կարդացել եք ամենքդ Նոր Կտակարանի մեջ՝ Գործք Առաքելոցում, Պրոքատիկեի ավագանի մասին դրվագը, ուր ասվում է, թե այնտեղ ավագանի մեջ հավաքվում էին բազմաթիվ հիվանդներ, բազմաթիվ ախտաժեռներ, և նրանք, ովքեր որ կարողանում էին հասնել այդ ավագանին, ջրերի մեջ բուժում էին գտնում իրենց հիվանդությանը: Ջուրը նաև մաքրության խորհրդանիշն է. հիշում եք նաև, երբ աշխարհը ապականության մեջ այլևս կործանվում էր, Աստված միակ միջոցը, միակ բալասանը, որ առաջադրեց մարդկությանը՝ ջրհեղեղով աշխարհը լվանալն էր, ջրհեղեղով մարդկային մեղքերը քավության առաջնորդելն էր: Ահա այսպիսի մաքրություն ենք ստանում մենք յուրաքանչյուրս Մկրտության արարողության ժամանակ, երբ խորասուզվելով ավագանի ջրերի մեջ՝ քահանայի օրհնության ներքո աղոթքներն ենք ստանում, թե Տեր Աստված, լվա այս երեխայի, մկրտվողի մեղքերն այս ջրի մեջ և նրան որդեգիրը և ժառանգակիցը դարձրու Սուրբ Հոգու և Քո Որդու:

Ջուրը նաև, ինչպես նշված է մեր աղոթքի մեջ, որ քիչ հետո պիտի ընթերցվի, մեղքերին թողություն է պարգևում, թույլ չտալով, որպեսզի մեղքերը և սատանայի ներ-

գործությունը մեծապես ազդեցություններ գործեն մեզ վրա: Ահա այս ջուրն է, որ քիչ հետո պիտի օրհնվի՝ նրա մեջ հեղելով Մյուռոնի սրբարար հեղուկը, պիտի դառնա մեր ժողովրդի համար օրհնության նոր աղբյուր, օրհնության և առողջության նոր գրավական:

Սիրելի քույրեր և եղբայրներ, այսօրվա ջրի օրհնությունը, ջրի արժեքը վերստին մեզ անդրադարձնել է տալիս, վերստին մեր մտքերն ուղղել է տալիս մեր միջավայրի, մեր մթնոլորտի, մեր երկրի նկատմամբ հոգացողությանը, բնական միջավայրի անադարտ պահպանությանը, որպեսզի յուրաքանչյուրս կարողանանք գնահատել բնական, նյութական այն արժեքները, որոնք պայմանավորում են մեր բնական և առողջ կենսակերպը: Եվ նաև մեզ վերստին անդրադարձնել է տալիս հոգևոր մաքրության անհրաժեշտությունը, որ յուրաքանչյուրս պարտավոր ենք վերստին սրբվել, մաքրվել, վերստին այս ջուրը ևս մեկ առիթ դարձնել անդրադառնալու համար հոգևոր մեր ընթացքին, անդրադառնալու համար մեր կյանքի տարատեսակ խոտորումներին, սայթաքումներին այլևս չկրկնելու մտադրությամբ և վճռականությամբ:

Թող Տիրոջ օրհնությունը ամենքիս հետ լինի, և այս ջուրը, որ քիչ հետո պիտի բաշխվի ձեզ՝ իր մեջ կրելով սրբարար հեղուկը՝ Սրբալույս Մյուռոնը, թող առողջություն բերի ձեր ընտանիքներին, առողջություն, քաջալերանք, առույգություն, ուժ, կորով և նորոգություն մեր ժողովրդի զավակներին, որպեսզի կարողանանք անդադրում կերպով միմյանց սիրել, անսակարկ և անկաշառ միմյանց նվիրվել, միմյանց հանդեպ լցվել ամբողջական բարությամբ, անշահախնդիր բարությամբ և այսպես աստվածաշավիղ ընթացքով շարունակել մեր կյանքը: